

**Kalaallit Nunaanni Eqqartuussisarnermik inatsisip inatsisillu allat assigiinngitsut allanngortinneqarnissaannut inatsisissatut siunnersuummut missingiut pillugu (Politiit pillugit aaqqissuusseqqinnermik, politiinik naammagittaalliuutiginnissinnaanermik aaqqissuusinnermik pilersitsinnermik il.il. naammassinninneq) Namminersorlutik Oqartussat akuersinissaat pillugu Inatsisartut aalajangiiffigisassaattut siunnersuut.**  
(Isumaginninnermut, Ilaqutariinnut Inatsisinillu Atuutsitsinnermut Naalakkersuisoq)

### **Saqqummiussissut**

(Isumaginninnermut, Ilaqutariinnut Inatsisinillu Atuutsitsinnermut Naalakkersuisoq)

### **Siullermeerneqarnera**

Kalaallit Nunaanni inatsisunik atuutsitsinnermut suliassa qarfik ukiuni kingullerni marlussunni qallunaanit kalaallinillu annertuumik ukkatarineqarsimavoq. Qallunaat akisussaaffiini suliassa qarfiit ineriartortinneqarnissaannut, matumani inatsisunik atuutsitsinnermut suliassa qarfiup ullutsinnut naleqquttunngorlugu nutarneqarnissaa ilanngullugu, qallunaat naalakkersuinik suleqatiginninnermik manna siunnersuut ilaavoq.

Piffissami nutaajunerusumi Kalaallit Nunaanni politiinut unnerluussisussaataitaasunullu atugassarititaasut pillugit aatsaat taamak annertutigisumik aaqqissuusseqqittoqarnissaa inatsisissatut siunnersuut manna aqqutigalugu siunnersuutigineqarpoq.

Inatsisissatut siunnersuut ilaatigut politiinik unnerluussisussaataitaasunillu aaqqissuusseqqinnissamik siunertaqarpoq, taamaalilluni nunap immikkoortuini politiit naalagaaffimmi nunap immikkoortuini politiit allatulli aaqqissuussaanikkut naligiissinneqassallutik.

Nunap immikkoortuini 14-ini politiit pisortaanerisa pisortatigoortumik naligiissinneqarnerat erseqqissarniarlugu Kalaallit Nunaanni Politiit pisortaanerata taaguutaata “politimester”-imiit “politidirektør”-imut allanngortinneqarnissaa tamatuma ilaatigut kinguneraa. Inatsisini allani taaguutip “politimester”-ip allassimaffigisaani malitseqartitsilluni allannguinissaq tamatumattaq kinguneraa, taamaammallu siunnersuut eqqartuussisarnermik inatsimmik inatsisinillu allanik allannguinermut pissutaavoq.

Siunnersuummi immikkoortoq alla pingaarutilik tassaavoq politiit sulinerat pillugu nunap immikkoortuini siunnersuisoqatigiinnik pilersitsineq.

Nunap immikkoortuini siunnersuisoqatigiit Kalaallit Nunaanni politiit sulinerat aaqqissuussaanerallu pillugit apequtit nalinginnaasut tamaasa oqaluuserisassavaat. Nunap immikkoortuini siunnersuisoqatigeeqarnermi politiit najukkanilu innuttaasut attaveqatigiittarnerisa patajaallisarneqarnissaat siunertarineqarpoq, taamaalilluni Kalaallit Nunaanni Politiit pisortaanerisa, Naalakkersuisut borgmesterillu ataatsimut soqutigisatik pillugit apequtit oqaloqatigiissutigisinnaalissavaat.

Siunnersuummi immikkoortoq alla pingaarutilik tassaavoq politiit pillugit naammagittaalliorsinnaanermik aaqqissuusinnerup eqqunneqarnera. Danmarkimi politiit pillugit naammagittaalliuuteqartarfiup suliqartarnera assigalugu Politiit pillugit

Naammagittaalliuuteqartarfik Arlaannaannulluunniit Attuumassuteqanngitsoq siunissami Kalaallit Nunaanni politiini sulisut sulitillutik pissusilersortarnerat pinerluutigisimasaallu pillugit misissuisarnissaa aalajangiisarnissaalu siunnersuutip kinguneraa.

Politiit pillugit Naammagittaalliuuteqartarfiup sulianik sullissinissaani Kalaallit Nunaanni pissutsinik naammattumik ilisimasaqarnissaq qulakkeerniarlugu siunnersuisoqatigiinnik, Kalaallit Nunaanni Politiit pillugit Naammagittaalliuutigineqartut pillugit Siunnersuisoqatigiinnik taaneqartunik, suliap paasissutissinneqarnissaanut atugassamik ilitsersuutaasumik oqaaseqaateqartartussap pilersinneqarnissaa siunnersuutigineqarpoq. Politiit pillugit Naammagittaalliuuteqartarfimmi maannakkut inissitsitsineq Siunnersuisoqatigiinni nutaani ingerlateqqiinnarneqarnissaa siunnersuutigineqarpoq, taamaalilluni taakku tassaalissapput eqqartuussissuserisoq ataaseq eqqartuusseqataasartullu marluk, taakku Inatsisartut inassuteqareernerisigut Justitsministeeriaqarfimmit toqqarneqassallutik.

Naalakkersuisut taamatut oqaaseqarlutik immikkoortoq Inatsisartunut oqaluuserisassanngortippaat.